

仙樂集

經名，仙樂集。金劉處玄撰。五卷。底本出處：《正統道藏》太平部。

目 錄

卷一

天道罪福論

白蓮花詞二十九首

酬徇臺安遠

疊鈞詩

藏頭拆字詩四十一首

卷二

五言絕句頌一百六十一首

三字歌

十二勸

十勸

卷三

四言頌

述懷十一首

贈玲七翁眷屬士二首

贈道衆五首

上敬奉三教道衆並述懷士二首

辭馬姑二十一首

四言絕句十四首

卷四

詞

江神子（並口號二首）

上平西四首

滿庭芳八首

神光燦三首

酌江月五首

水龍吟

滿路花

行香子二首

山亭柳

驀山溪六首

玉堂春二首

踏雲行九首

惜黃花三首

青杏兒三首

武陵春二首

感皇恩二首

望遠行

定風波四首

望蓬萊六首

卷五

五言絕句頌一百九十首

仙樂集卷之一

神山無為應緣長生子劉處玄造

天道罪福論

無火院罪，賜清涼福。無貪姪罪，賜安樂福。無惡濁罪，賜善清福。

無憎愛罪，賜清平福。無苦惱罪，賜知足福。無著身罪，賜修真福。

無讚邪罪，賜明正福。無毀人罪，賜讚己福。無萬愛罪，賜萬清福。

無妄想罪，賜通仙福。無分別罪，賜善通福。無妬嫌罪，賜歸順福。

無戀世罪，賜洞天福。無怕衰罪，賜松筠福。無姦狡罪，賜如意福。

無輕人罪，賜重己福。無慢人罪，賜天祐福。無戀假罪，賜明真福。

無俗惡罪，賜道善福。無攀高罪，賜德歸福。無縱心罪，賜通道福。

無壽者罪，賜長生福。無狐疑罪，賜感應福。無恩冤罪，賜仙伴福。

無動靜罪，賜真常福。無退道罪，賜祖先福。無地獄罪，賜天堂福。

無有為罪，賜無為福。無生滅罪，賜超昇福。無狠毒罪，賜全身福。

無是非罪，賜道德福。無妄傳罪，賜大成福。無害命罪，賜延年福。

無自高罪，賜人敬福。無揀擇罪，賜無窮福。無戀濁罪，賜清真福。

無損氣罪，賜頤神福。無懷惡罪，賜心安福。無私邪罪，賜公正福。

無蠻富罪，賜天樂福。無戀有罪，賜無生福。無剛硬罪，賜上善福。

無人道罪，賜天道福。無多藏罪，賜萬光福。無損人罪，賜益壽福。

無殺害罪，賜修生福。無嫉妬罪，賜夷善福。無攀緣罪，賜全神福。

無惡逆罪，賜孝子福。

無善道，則賜輪回罪。無公平，則賜生滅罪。無忘貪，則賜不足罪。

無常情，則賜壽夭罪。無通變，則賜愚魯罪。無清深，則賜濁淺罪。

無悟道，則賜迷俗罪。無厭寵，則賜多辱罪。無就下，則賜危險罪。

無善福，則賜惡報罪。無三孝，則賜十惡罪。無明見，則賜幽冥罪。
無真禧，則賜身墮罪。無真常，則賜榮枯罪。無厭世，則賜萬濁罪。
無鍊形，則賜販骨罪。無悟真，則賜迷偽罪。無愛善，則賜墮惡罪。
無福慧，則賜墮落罪。無大達，則賜福業罪。無靈明，則賜昏迷罪。
無遠小危，賜大禍罪。無禁口非，賜拔舌罪。無順道，則賜刀山罪。
無害物，則免鑊湯罪。無戀情，則免死苦罪。無幻形，則免去來罪。
無生樂，則免死哀罪。意普敬，則免不平罪。無新愆，則消舊業罪。
順天條，則免過去罪。積陽道行，無陰路罪。修陽道功，救永沉罪。
達無為道，無萬有罪。悟穀食居，無利害罪。悟三聖言，無高下罪。
出天地殼，無萬物罪。去福地隱，無應物罪。通明晦謙，無自高罪。
出五道轉，無投胎罪。性今古通，無愚執罪。悟天道通，無多言罪。
見道無形，無著有罪。愛非理賄，有填還罪。通天道夷，無他非罪。
搜己過達，無昧己罪。救四生形，無害物罪。通靈琴響，無直言罪。
知黑白明，無殺機罪。明三皇始，無弄文罪。見亙古形，無著相罪。
上元賜福，中元赦罪，下元解厄，三元救世。

白蓮花詞二十九首

百歲人生速悟，三萬六千有數。晝夜忙忙烏兔，
限到難趨死路。古今許龐家去，也應都免輪回苦。
別有鉛房汞庫，一點靈明是主。道樂無塵無慮，
欣則行歌道舞。古今許龐家去，也應都免輪回苦。
敬道高真祐護，保命身安養素，惡濁消亡作做；
聖道難逢難遇。古今許龐家去，也應都免輪回苦。
道救九玄七祖，咫尺蓬萊有路。三教超昇門戶，
仙道千年一遇。古今許龐家去，也應都免輪回苦。
世外仙宮寶所，得道真靈永住。布德名傳萬古，
救死哀生孰悟。古今許龐家去，也應都免輪回苦。
大醮亡魂聖度，亢旱難逢法雨，清靜身心餐素，
功德圓成仙路。古今許龐家去，也應都免輪回苦。
性焰命油省悟，便是真生妙趣。道氣修成堅固，
蓬島仙鄉有路。古今許龐家去，也應都免輪回苦。
意想千頭萬緒，食足衣豐不悟。有日無常獨步，
魄散難逃陰路。古今許龐家去，也應都免輪回苦。
有德多謙少怒，莫要嫌貧愛富。萬事包容衆語，
感動高天聖祖。古今許龐家去，也應都免輪回苦。

今世為人貴富，必是前生有悟。恐墮三塗陰府，
未盡天元再遇，古今許龐家去，也應都免輪回苦。
七寶過如須彌，道果要成也未。早悟金剛妙理，
便是渡河超彼。道全德之也貴，大家總赴玉華會。
未達陰陽看易，覺了通天徹地。厭濁闖然出世，
守道古今有幾。道全德之也貴，大象總赴玉華會。
道妙清虛覺慧，應變涌泉得意。只要君心不昧，
隱與五千至理。道全德之也貴，大家總赴玉華會。
欣則看書困睡，洞外松前自喜。保命頤神養氣，
抱一免沉下鬼。道全德之也貴，大家總赴玉華會。
秋月澄潭徹底，現出圓光照體。二八無虧真喜，
撒手行來無罪。道全德之也貴，大家總赴玉華會。
迷者多生謗毀，戀色貪財競氣。有日無常卻悔，
五七閻王問罪。道全德之也貴，大家總赴玉華會。
業鏡前來照你，皺著眉兒垂淚。難用在生辯智，
到此兒孫難替。道全德之也貴，大家總赴玉華會。
頓悟名山福地，雲水琴書活計。一念無生弗罪。
達者古今有幾。道全德之也貴，大家總赴玉華會。
得失上天入地，三寸不來那世。魂魄消亡為鬼，
性命完全仙易。道全德之也貴，大家總赴玉華會。
恣樂清平無比，石畔松間快矣。鶴舞鸞迎唯喜，
鍊就丹光殼蛻。道全德之也貴，大家總赴玉華會。
混沌至今萬有，死去生來怎久。一箇真靈不朽，
命在南辰北斗。子孫醮緣重遇，敬信全仗高真度。
陰路久沉萬祖，地獄無門出去。上有十方救苦，
造業衆生無數。子孫醮緣重遇，敬信全仗高真度。
既有生老病苦，死墮陰司惡處。只為生前不悟，
催上刀山劍樹。子孫醮緣重遇，敬信全仗高真度。
牛頭獄卒急怒，到此口難分訴。痛苦無停無住，
拔舌生前毀主。子孫醮緣重遇，敬信全仗高真度。
沉在幽冥黑路，陽道天光甚處。萬劫千生受苦，
十惡之人有數。子孫醮緣重遇，敬信全仗高真度。
天上人間兩路，只愛貪姪嫉妬。樂極難逃病苦，
魄散魂消入土。子孫醮緣重遇，敬信全仗高真度。

曾看北邙塚墓，古往多少貴富。限到怎生趨去，
頓悟玄元道祖。子孫醮緣重遇，敬信全仗高真度。
世外仙家樂處，異景都無四序。得道真超寒暑，
積行真人救苦。子孫醮緣重遇，敬信全仗高真度。
來謁名山洞府，頂笠携筇信步。認得金烏玉兔，
妙覺傻猿縛住。子孫醮緣重遇，敬信全仗高真度。

〔酬徇臺安遠〕

徇臺安遠泊衆親，靈虛觀助緣，酬贈以詩。

長生濟度未為賢，應化人間自肯錢。黃籙醮成通薦拔，靈虛觀就悟良緣。
百朝累行明三晝，千日修功敬萬年。上報四恩全道德，無愆保命免幽泉。

疊韻詩

〔年〕年春後又花殘，〔殘〕景凋零木草全。〔全〕道慧靈無好醜，了真清意辨愚賢。

〔賢〕人背劍遊雲洞，達士携琴住錦川。〔川〕近終南筠萬頃，好來世外論長年。

藏頭拆字詩四十一首

□訣希夷無上尊，□田鶉穀守餘藩。□雲到處思三孝，□午行來憶四恩。
□覺鉛昇扃地戶，□明汞降闡天門。□分萬法清通海，□省揚眉道弗言。
□名徐甲駕青牛，□極初分預九州。□利天人昇不夜，□昏下鬼墮冥幽。
□明道德無為好，□達玄元沒價酬。□卯倒顛成化造，□乎廉孝侍君侯。
□談聖教道興隆，□去朝元鶴馭通。□子愆消常歲稔，□真福累永年豐。
□皮破處黃芽現，□樹生時白雪逢。□地因緣明化世，□輪飛走碧天中。
□外修行道性優，□真無意謁公侯。□通易免三空罪，□達難趨九地囚。
□口明傳人有惠，□心化度道無收。□聞河上傳文帝，□對君王十二旒。
□峰霞洞度昏朝，□射松筠勝柳桃。□甲鍊丹明異景，□虵吞鼈飲香醞。
□宮玉妃朝賢聖，□位金嬰遠貴豪。□味羊羶俱盡戒，□分清靜隱蓬蒿。
□歷京華厭世塵，□龕雲洞性清新。□鉛鍊就天光瑩，□汞修成降氣勻。
□物有靈明道體，□心無想隱真神。□申燕坐無憂喜，□達昇仙呂洞賓。
□養芝苗覺性開，□年真了去無來。□閑靜看詩千卷，□闋時斟酒一杯。
□遇玄元功行未，□逢至道聖賢催。□超寒暑陰陽外，□旦無雲發迅雷。
□滾雲濤近碧天，□通法海命延年。□分玉貌過潘岳，□箇金容勝美妍。
□托烹鉛成九轉，□嬰鍊汞結三田。□傳祕訣蓮峰去，□訪仙家住錦川。
□清鍊意似寒灰，□降中央劣傻回。□子雲邊石女訪，□真洞外木人催。
□公未悟天中月，□性先明雪裏梅。□到瑤臺遊閬苑，□知仙卉四時開。

□後牛形中氣粧， □農九六喜生陽。 □通世外雲煙闊， □覺壺天日月長。
 □掛六銖明性燭， □消三業熱真香。 □冥恍惚時時運， □子瑤池泛玉觴。
 □長靈芽妙運陽， □令風雨散天香。 □宮殿外三花放， □位樓邊七寶粧。
 □芾題詩思太白， □華行道鍊中黃。 □仙聚會談今古， □口無爭衆樂堂。
 □真守道永心灰， □降陰昇外道回。 □子靈呼嬰姪到， □真道攝虎龍來。
 □回萬偽身心定， □轉三空慧眼開。 □載清軒看古教， □華嘲景泛金壘。
 □頭食蜜形無槁， □外煙霞泯萬巧。 □手難栽不謝花， □功易種靈芝草。
 □年鍊己洞天居， □道修真塵外好。 □後午前似一時， □常欣欣看莊老。
 □時未卯覺先寅， □表俱明預暗陳。 □海飛鳥御玉汞， □天走兔搗金新。
 □光不讓人間景， □圃難同世外春。 □往月來今古事， □訪幼稚死生均。
 □忘名利下高杆， □甲金庚包暑寒。 □九秋前花滿檻， □三夏後菜盈盤。
 □斟玉液從朝飲， □獻珍羞至夜闌。 □望碧霄雲外路， □乘鸞鳳有清歡。
 □見晴空潰寸霾， □通三二道心灰。 □遊勝地嘲松竹， □隱仙園詠柳梅。
 □見殘春生滅夢， □逢缺月暑寒催。 □君認得圓光照， □鏡真明兔去來。
 □迴萬有寶光新， □斧開山見玉人。 □轉三陽黃蘗綻， □纏四相雪花春。
 □來月往逢丁卯， □禮朝參遇戊辰。 □掛雲裳藏碧洞， □雲鍊出九霄身。
 □來靈運寶光收， □去芒兒白徹牛。 □地良因闡夕旦， □心應變定剛柔。
 □金頰倒蓮峰住， □道須知彼岸遊。 □外逍遙修性命， □談范蠡一扁舟。
 □餐美膳敬人催， □去天厨重造來。 □見嬰兒先寸悟， □聞姪女又頭回。
 □傳玉訣超三昧， □射金光現兩腮。 □道窮通天地外， □陽樓上泛瓊盃。
 □人未曉悟其寅， □洞仙遊閭苑春。 □月急催塵景謝， □儀閑逐道光新。
 □傳汞藥雲中客， □訣丹經物外賓。 □寶祥光重出現， □嬰達了任舒伸。
 □從入理隱真光， □見壺中日月長。 □掛雲裳朝道祖， □餐黍米鍊丹陽。
 □通子後明紅燭， □降齋前熱川香。 □杳冥冥唯省悟， □思翠竹到涼堂。
 □龍蟠虎達其寅， □卦抽添應美辰。 □悟海天雲浪積， □明川地雪霜勻。
 □童引翫蓬壺景， □姪先遊洛圃春。 □月走飛生老變， □華粧點世塵新。
 □訪小隱住青城， □道人間慈救生。 □鍊汞鉛明假合， □談道德悟真誠。
 □清積行憐貧賤， □耀修功愛貴榮。 □用無高休更下， □居出入似量衡。
 □仙樂道住雲邊， □子閑吟物外編。 □結垂光超九地， □侵艷景達三天。
 □通易曉天元歲， □法難明甲子年。 □有三生真頓覺， □知俱泯是高賢。
 □身飄逸到雲軒， □馬重來孰悟冤。 □拽了然恩極害， □心相應害生恩。
 □知漢將逢純祖， □見扶風遇太原。 □隱居山真混世， □經大度五千言。
 □國真仙隱洞賓， □遊顯跡喜賢臣。 □參萬妙全天意， □覺千玄用率循。
 □視清平行道德， □聞讚上盡修仁。 □儀養就元初貌， □極時增福萬鈞。

□論京華隱大才，□然寒去又溫來。□明道上如星朗，□悟胸中似錦堆。
□養松筠三季翫，□修艷卉四時催。□全萬行朝元去，□想先賢德妙哉。
□遊雲洞寶光垂，□去超塵別有期。□滿虛心真弗病，□盈實腹口忘饑。
□緣內外誰人見，□悟中邊幾箇知。□論天堂並地獄，□通無上妙堪宜。
□思罕見百年翁，□客真昇入碧穹。□弩閑時多國富，□荒亂後少民豐。
□明覆載通夷行，□運周天達聖功。□士農商崇善道，□胡欣樂讚王公。
□心通似錦江流，□火相交漢勇侯。□善一方風雹少，□明三界雪霜稠。
□通廣累三千行，□運微傳十二周。□訣自然樞要悟，□常樂道喜歌謳。
□下羣賢論古今，□然達者是知音。□烏垂足通天朗，□兔搗光悟道心。
□化意如須彌大，□謙靈似巨洋深。□雲到處仙家好，□種黃芽壬雨霖。
□歸雲路到陽天，□道虛無本自然。□降玉鑪光易悟，□開寶鑑口難傳。
□修汞藥超生死，□達丹書弗黨偏。□道貴華仙道實，□仙邀我去參賢。
□聞海市化雲城，□按中央道氣生。□月有圓壬雨潤，□年無缺赤龍耕。
□通玉汞陰陽結，□纏金鉛麻麥成。□戟爭心歸道善，□傳萬古讚清聲。
□極祥明照夜元，□明無上自然遷。□胡萬行超今古，□慧千通達聖賢。
□寶錢財時愛變，□肝肺腎日光圓。□非言是貪無足，□我螢飛燒大千。
□滅煙消混世居，□黃大醮闡縈蒲。□雲到處鶉居性，□死超離穀食孤。
□悟伏羲三畫像，□明易卦六爻圖。□光認得真顛倒，□岸無為有有無。
□年混世樂恬然，□鍊真鉛至行遷。□子雲中尋小隱，□虛物外近高賢。
□都頂上靈風爽，□洞溪邊皓月圓。□味要餐仙獻果，□然功行仗三千。
□說真昇去不回，□公仙桂月中栽。□方艷卉三春謝，□外天花四序開。
□極調龍蟠藥井，□真引鶴到丹臺。□明真了朝元去，□想南華意大哉。
□西烏墜日難回，□說無常意未灰。□見淵明來又去，□聞丁令去重來。
□金異位春前柳，□酉同宮臘後梅。□到禁煙仙客悟，□斟玉液勝瓊醅。
□見新春寒漸回，□談玄理去重來。□金間隔靈陽照，□水相交癸潤蓼。
□世總迷三月好，□今唯省四時催。□公入藥圓光應，□達玄元悟老萊。
□葉花開到海濱，□歸相近禁煙春。□生日沒都迷假，□是人非孰悟真。
□極翠霞常作伴，□方賢聖永為鄰。□陽樓望長安道，□守希夷萬古新。
□分愆盡福緣重，□達希夷至理窮。□內鍊丹金鼎白，□中運火玉鑪紅。
□從了道朝王母，□載成真訪木公。□去携雲三清信，□來跨鶴九霄通。
□遊閬苑觀花錦，□紫瑤臺對月風。□滅尸亡無四序，□常順道氣和融。

仙樂集卷之一竟

仙樂集卷之二

神山無為應緣長生子劉處玄造

五吉悶絕句頌一百六十一首

念道覺真安，命清勝鍊丹。通天全至行，跳出死生關。
昨日似陳團，今朝憂又歡。靈虛齋敬禮，知觀謝尊官。
無爭禍不侵，有道聖賢欽。積行生生貴，福真莫外尋。
禪通明釋藏，禪定真無相。禪慧口難言，禪天無缺朗。
無事不貪求，無爭不辨休。無言只念道，無喜亦無憂。
一別又經秋，去都過保州。尊官為念道，寬轉近西遊。
垢盡寶光明，碧天萬里青。真平全至行，應變悟仙經。
輔國置仙菴，捨資道福貪。辯能明萬有，會得卻如憨。
積行妙通天，心真泯萬愆。古今明了者，命住寶光圓。
大道本無修，隨緣弗外求。始終無變異，歸去列仙儔。
食葷勿殺生，治政似冰清。無事看莊老，通天至行成。
無竈免煎熬，火坑幾箇逃。清涼福地別，饑後喫蟠桃。
希夷為道母，赤子是真兒。相見超生滅，昇仙行就時。
真平至行全，保命體延年。三教明真理，未仙也是賢。
看地見飛星，沒中聖位靈，兩廂蓋草舍，松檜四邊青。
橋就更修道，無事看聖教。功行兩雙全，了了無生老。
臨水望思山，逍遙出世間。這些幽雅景，不讓古長安。
長通四相忘，頓覺免無常。得道離生滅，蓬萊去莫忙。
莫愛也休憎，真常神氣靈。命清癸耀燦，達理自然昇。
草舍近河山，清居厭世間，晝閑看道德，夜靜聽潺湲。
菴傍近會稽，遠卻世塵非。道覺真靈瑩，澄光萬耀輝。
西南近黃白，石窟真仙宅。隱道伴松筠，他年蓬島客。
福地靠三陽，山前是道鄉。龍華同一會，旦望預行香。
山聳應天門，清真酬四恩。有人來問道，應對敬其尊。
幽居近北山，無意想塵寰。助道田三段，養真麻麥餐。
臨水蹬山青，碧天萬里平。頓明全道德，歸去大羅行。
前後有青山，甲庚明二關。一真顛倒妙，空外白雲閑。
上善應清清，行通似水平。天青懸萬象，性闔命光成。
甲地妙通清，真明道象靈，夷然全至行，歸去碧霄行。
舉意掩他非，希夷泯見知。應機明萬慧，無著亦無離。
茅舍喜清居。閑看三教書。自然明妙理，世外樂無餘。
亂作寄汾陽，願人做馬王。混塵真世外，蛻殼到仙鄉。
祈雨各逐村，衆善天垂恩。莫殺生靈福，香燈茶果存。

頓覺悟金剛，真明四相忘。無形性不老，認得免無常。
敬信辨真齋，清通免去來。始終心不變，蛻殼到蓬萊。
常開方便門，出入敬真尊。日日酬三孝，時時報四恩。
前廳對後堂，冬夏取炎涼。清善崇三教，人間世夢忘。
順尊至孝全，意靜勝參禪。四相真忘盡，頓明佛是仙。
恍惚發珠光，回光晃八方。螢明難吐耀，天瑩現真陽。
忘世意休爭，心閑看道經。了真無老死。達理自然明。
真趣道眸開，善清無禍災。沖和全性命，蛻殼到蓬萊。
無惡氣清深，忘情覺水金。虛心真混合，抱道鬼神欽。
頓明世夢虛，趨業洞天居。超彼靈峰畔，欣時看古書。
忘塵悟死生，大達意無爭。應變明真理，他年功行盈。
日用自然真，沖和氣養神。命清金耀結，歸去了仙人。
出入應環牆，真通動靜忘。卦爻明坐臥，陰盡變純陽。
意滅覺真生，微通道眼明。無憎全至行，命住氣神靈。
常似聖賢隨，自然意泯癡。蛾燈聞早悟，真了碧霄歸。
無欲似天青，自然萬象明。巨靈與道洽，應變語如經。
真悟松間鶴，偽迷蛾戀燈。濁清明兩路，就死入油烹。
早早悟骷髏，命清免九幽。金嬰調玉姪，真瑩上雲頭。
清柔神氣靈，盡愛命光成。達理通天道，真昇雲路行。
無物道無傳，真通結汞鉛。要歸蓬島去，功行積三千。
造化隱丹經，天青萬象明。真光非意想，顛倒甲通庚。
冬凜採黃芽，夏炎收白雪。金嬰出玉峰，到此離生滅。
善清修性命，泯慮除罪病。道德自然通，他年朝至聖。
日用善清通，氣神相見功，忘情全命耀，真去與仙同。
物似鏡中形，光通萬象明。應塵無罣礙，覺了行功成。
頓明生死大，常善居塵外。巨海變桑田，巨靈與道在。
念道命光圓，無形性達全，自然通上善，蛻殼是真仙。
明道泯爭愛，真通性命大。堅志免輪回，石爛神光在。
目前萬事假，莫縱猿兒傻。樂道喜松峰，趨偽真脫洒。
身老真無老，修行無忒早。命延道德全，也得歸蓬島。
無我神氣清，忘欲癸光停。覺了希夷妙，自然大道成。
世夢轉頭空，忘塵見巨容。仙鄉真景異，雲路仗修功。
輪回幾萬遭，達理死生逃。養就真鉛汞，珠光釣巨鰲。
真通泯世機，頓解死生危。道樂松峰下，沖和結坎離。

濁惡變清善，輪迴生滅免。命全光不缺，真了碧霄現。
到岸了無生，靈峰雲外行。樂真隱霞洞，應景對清平。
道善悟無爭，鍊真降火生。癸光全法體，蛻殼自然昇。
念色想骷髏，真沉墮九幽。無生全道妙，命住訪瀛洲。
喜怒寸俱忘，真通性有常。氣和全命耀，蛻殼到仙鄉。
日用自然真，沖和氣養神。意清全癸耀，陰盡碧霄人。
損有了真無，孤雲在碧虛。往來何罣礙，全道是功夫。
真明通理趣，垢盡心開悟。抱道樂清貧，自然達萬古。
販骨幾千遭，無生一念逃。自然通萬慧，保命運陽爻。
上士悟無爭，沖和道眼明。真通全萬行，覺了自然昇。
至死常清靜，忘情完性命。超昇免下鬼，大羅朝賢聖。
念通明道理，真了無憂喜，陽降氣神靈，孤峰覺岸彼。
縛住傻猿用，真明應不動。清通全道德，靈隱華陽洞。
善和道性通，非是聽如聾。掩惡全至道，明知萬事空。
忘貪有甚爭，無我覺真明。照見亘初面，功成雲路行。
清真保性命，愛盡心猿定。無罪免沉淪，碧霄朝至聖。
從善悟死生，命清神氣靈。玉峰霞洞隱，應變妙通經。
明虛可奉真，降火變紅銀。清志始終達，修成身外身。
細思生死大，到岸離苦海。樂道免沉淪，隱真遊世外。
日用縛心猿，觸來滅黑煙。真常成善果，歸去號神仙。
明一是修行，寸靈常靜清。積行除憎愛，歸去自然昇。
月缺變光圓，命全是了仙。意清通道妙，功行積三千。
書院隱青山，修真厭世間。道免輪迴苦，逍遙松下閑。
無情石變灰，妙理幾人知。這箇真無壞，弗為應有為。
學道要真堅，觸來莫發煙。清通全上善，盡愛命光圓。
失道墮傍生，了真全命靈。理明通古教，厭世洞天行。
蛾愛戀燈光，迷陰命怎常。鶴思松悟覺，真去到仙鄉。
堅志了無生，修真有甚爭。厭塵霞洞隱，保命悟仙經。
達理真超彼，古今通有幾。清平功行全，昇入丹霄裏。
清通全性命，忘機泯罪病。覺慧自然明，住行如對聖。
販骨死生大，沉淪千萬載。了真得道陽，海變松枯在。
慧通明正理，得道真超彼。天瑩寶光圓，寒潭清徹底。
日用去貪嗔，真通得道因。微明神氣結，命外更無親。
泯我無灾禍，知空都打過。志堅得道陽，應物全因果。

虛心念正通，應變理無窮。達了明無上，汞鉛交結功。
他非似己過，自是無爭我，掩惡揚人美，德全成道果。
降耀覺沖明，自然互貌靈。塵塵真不染，造化甲通庚。
輪回生滅大，厭世遊天外。堅志樂清平，松枯性命在。
真通和氣清，天瑩寶光明。妙覺真顛倒，自然鉛汞成。
萬通歸無事，念道超生死。應變合真經，自然明奧旨。
至善真無惡，世空意莫著。清平全道德，了了蓬萊約。
妄滅慧光生，善清道性靈。微通全命耀，達理行功成。
心忘道體存，存三酬四恩。他年功了了，亘容朝世尊。
明道性真常，貪嗔濁念忘。清通三寶結，蛻殼到仙鄉。
清一要真堅，盡貪滅舊愆。洞天修性命，功行積三千。
忘愛命光圓，意清似碧天。真明全道理，歸去步雲軒。
失道近傍生，了真雲路行。命清免販骨，達理自然昇。
真常意似初，世偽悟知虛。認得無形貌，道通運黍珠。
性光命似油，靈焰照無休。頓覺超生滅，清歡天外遊。
明焰悟三元，無虧寶鑑圓。古今幾箇曉，覺了便通仙。
悟道無人我，光通運降火。自然圓耀明，無上應仙果。
奉真清志堅，無物覺先天。汞明全二八，未仙混世賢。
明道掩他非，無憎賢聖知。德全通上善，真去步雲歸。
道用絕貪嗔，沖和氣養神。命清三寶結，蛻殼現真身。
正理自然通，中邊不殫功。慧明鉛汞結，真去與仙同。
日用要擒猿，真如對聖賢。清通鉛汞結，功行了三千。
念道明真用，松峰隱碧洞。清平積行功，性達結鉛汞。
柔弱悟真火，無物通真我。頓覺了真修，應有成真果。
性光命似油，早早悟骷髏。情盡圓無缺，碧霄月正秋。
愛道卻憎貪，真通身內三。沖和全法體，達了蛻行菴。
日用運靈珠，寶光晃碧虛。頓然真覺了，三界外無拘。
無生萬業消，清靜性逍遙。妙用明真理，命圓喜寂寥。
明一靜清常，通微動靜忘。德明真應物，道慧運天光。
沖和道性寧，清命漸通靈。達理忘機了，蓬萊雲路行。
滅惡通真善，慧眼開時見。三寶全修鍊，得道輪回免。
大悟不爭空，忘形見亘容。理明全至行，蛻殼住仙宮。
厭世居嶽頂，抱一通壬丙。樂道悟希夷，仙鄉四序景。
抱真悟死生，天瑩萬光明。罣礙心無了，白雲空外行。

退志墮傍生，進真道氣靈。清通全癸耀，平善行功成。
覺了自然常，通微陽養陽，虛無包萬化，至德隱佳祥。
日用理通真，道全物外因。他年功行了，朝聖去携雲。
人我障真修，趨冤福地遊。松筠常作伴，真了訪瀛洲。
頓明通正理，今古人間幾。至德妙清平，靈峰道岸彼。
真覺道眸開，白雲去又來。碧空常自在，鶴引到蓬萊。
大道本無名，地天歸靜清。闔通明萬化，達理行功成。
丘劉譚馬敬，忘形修性命。清志有始終，寸盡萬愆病。
丘劉譚馬善，降火明修鍊。結就汞和鉛，勸人依教典。
丘劉譚馬悟，別有祖師度。忘世洞天遊，雲霞為伴侶。
丘劉譚馬覺，了道蛻凡殼。昇入太無中，亘靈居杳邈。
了真出死生，應變自然平。理洽天心正，雲歸朝上清。
卦盡命光休，忘情好悟修。孤雲野鶴伴，真了到瀛洲。
人我障冲和，善清功行多。命圓全道體，歸去出娑婆。
迷陰沉下鬼，抱道真超彼。清靜妊嬰歡，樂安通鍊己。
悟道超生死，真通明奧旨。自然微妙深，行就朝元始。
應變道樞機，冲和覺妙微。真了光無缺，碧空萬道輝。
性命在無中，真空空不空。自然包萬化，今古幾人通。
天元道善時，清志超生死。達理愛憎無，鍊真明奧旨。
妙清靈慧知，道解死生危。依得金剛偈，通真霄漢梯。
覺照見天光，神清道有常。應塵明萬慧，真去禮丹陽。
業盡無煙火，謙柔弗競我。氣神相見靈，道證無為果。
明道通真用，形忙心不動。垂光照亘靈，結就真陽永。
常搜自己非，達理掩他非。道德真經悟，不言閑是非。
覺了性無爭，真清似水平。德通全上善，自是行功盈。
頌曰

順真則生，違道者死。順真則平，違道者濁。
順真則柔，違道者剛。順真則福，違道者禍。
順真則安，違道者病。順真則昇，違道者墮。
順真則鍊鉛，違道者喪命。順真則神靈，違道者氣逆。
魂魄散為鬼，陰陽聚成仙。身心靜者為功，應變夷者為行。
志始終則達，覺清善則通。居山財莫著於闔，混塵則休生於動。
或隱洞天，或遊京華。性似孤雲，形如野鶴。
自然之道，微光有作。住行坐臥，萬物無愆。

蛻殼真歸，出離三界。永免輪回，無來無去。

三字歌

汾陽解，易象明，通天外。汾陽解，五千明，不言拜。
汾陽解，金剛明，真佛壞。汾陽解，萬物盡，惟道在。
份陽解，混世華，無罣礙。汾陽解，性命存，超三界。
汾陽解，達希夷，知沒賽。汾陽解，古今明，悟法海。
汾陽解，近松筠，逍遙快。汾陽懈，無價珍，錢難買。
汾陽解，樂清虛，常寧耐。汾陽解，了真修，結雯蓋。
自然解，世人住，我不愛。

十二勸

有信人從，有真歸奉。有謙德順，有通理明。
有常無變，有定無亂。有是忘非，常善無惡。
真愛無著，忘情無漏。氣清通微，全道神靈。

十勸

一勸不得自知是愆過慢人，縱意不改。
二勸不得自失錯，嗔人道著，常起念怨人。
三勸不得自銜己是，直言常說他人非。
四勸不得誇自高，滅一切入道之人。
五勸不得不依經教說道理。
六勸不得有始無終，心意常要似初相見之時。
七勸不得常說他世人之短，只要常言世人之美處。
八勸不得作事不平等，不得見有施利者愛，見無施利者嫌。
九勸不得定慧者，修行之人不得不守靜，未達理未開悟，不得不看書。
十勸不得執著有無，不得不悟住行坐外心常清靜。

仙樂集卷之二竟

仙樂集卷之三

神山無為應緣長生子劉處玄造

四言頌

述懷

功成身退，清居養浩。臨水依山，閑看莊老。
地有松筠，四時常好。洞天深處，要行便到。
修真靈驗，命住見效。舊業消亡，新愆莫造。
真崇至道，與世顛倒。歸去淵明，先遊蓬島。
趲了輪回，仙鄉無惱。古今達士，因通三教。

又

無始已來，死沉萬祖。天元將盡，黃籙救苦。
千千一二，真心肯悟。意無憎愛，高真見許。
人生百歲，只尋生路。積業如山，難趨陰府。
十惡罪重，永居苦處。陽功陰行，怎生作做。
普生敬信，莫起別慮。世財小可，真實之語。
要動天地，清靜餐素。臨醮幾日，行行住住。
暗有吏神，晝夜察汝。察得無私，五師來度。
上奏天皇，洪禧廣布。再觀三光，後死難遇。

又

百千禧助，名傳萬古。合宅全家，意如龐許。
德孝兩成，為人貴富。預修性命，永無病苦。
出離生滅，不來不去。大羅仙鄉，得道常住。
天光霞彩，化成寶所。六銖衣掛，朝元異路。
閬苑蓬山，真仙會處。過了天元，道緣難遇。
三教無分，全真門戶。無為應為，誘人開悟。
清平功行，真非捨取。陰陽之外，先天之祖。

又

伺候到來，即合參拜。心交淡常，意想不怪。
倏忽門東，相別二載。山水依然，人多不在。
命如珠露，怎得無壞。生在中華，數盡難再。
寸靈道寶，萬金難買。未盡貪爭，都緣恩愛。
名利四業，人人都解。卻明道德，真通法海。
祥煙瑞氣，結成雲蓋。信步松峰，神超雲外。
世偽知空，死生事大。洞天清隱，無拘自快。
斡運沖和，二儀交泰。達了希夷，真昇陽界。
倣倣許龐，無恩無害。

又

百歲人生，七旬稀少。世偽知空，何時有了。
大道自然，清平是妙。萬物無愆，勝如作醮。
古今世夢，頓明真曉。識破浮生，總歸一笑。
性命之外，生前好掉。

又

為官清正，真無罪病。上有四恩，積行普敬。

忠孝治民，靜心養性。意不外遊，自然神定。
掩惡揚善，非言莫聽。去除憎愛，常行平等。
弗戀世華，閑步松徑。綠水青山，洞天仙景。
本來面目，鍊磨如鏡。明今照古，守道自省。
功德周圓，大羅朝聖。

又

人生七十，古今稀少。世夢知虛，都歸一笑。
閑裏尋閑，忘機是了。萬種空華，轉頭虛矯。
真崇道德，漸通玄妙。意除憎愛，勝修大醮。
身中性命，一事非小。似清平，陰公難叫。

又

無中明有，妙通神咒。玉液瓊漿，重樓上有。
醒時清真，命延福壽。金剛四句，經中慈救。
天道難言，無形不朽。顛倒陰陽，卯昇見酉。
希夷自然，三光靈秀。閬苑仙花，勝春花柳。
運轉南辰，慧觀北斗。大達無為，任從飛走。

又

閑念真經，勝言非是。萬事知空，然不二。
敬真無退，了明仙子。松竹為鄰，守道清志。
始終弗變，天機暗賜。妙覺真常，俱忘動止。
亘初容貌，有形難似。陰陽之外，出離生死。

又

子母相逢，自然明道。敬信真心，歸依三教。
憎愛去除，應變通奧。意泯貪爭，無罪無惱。
命似珠露，修行宜早。認得瓦靈，永弗生老。
頓覺微光。雲路便到。松峰樂道，隨緣一飽。
結就汞鉛，養成內貌。功行雙全，真昇蓬島。

又

市用百貫，買樹四株。莫強他求，只助功夫。
未見之事，少實多虛。自願結緣，敬信不無。
萬中有一，福行有餘。武宮仙觀，勸額靈虛。

〔購冷七翁眷屬〕

出家冷七翁昇化，親族重辦齋，道場叮囑道人，不得要看經錢。
看經無錢，只喫齋飯。羽衣自願，道場好看。

至德洪禧，掩非人讚。未了真修，多少魔難。
眼前聲聞，理明虛幻。口心相應，世間希罕。
慈救衆生，總超彼岸。覺性沖和，木金相問。
鍊就真形，一衝雲漢。

又

父母生前，幾箇真知。人言上壽，中壽者稀。
自幼至老，有悟有迷。福愆兩事，逐性相隨。
身如月缺，命全無虧。明道弗妄，了真何疑。
靈光透出，便見霄梯。慧觀八極，撒手東西。
天道難言，實妙希夷。既通福行，鬼使難追。
洞天咫尺，閬苑瑤池。自然寶劍，常鎮蛇龜。
物物無著，三界超離。蛻殼真去，空外雲歸。

又

名韁利鎖，燒身猛火。冤債恩情，業緣難越。
積禍如山，怎成道果。頓省性命，競甚人我。
世為知空，般般可可。相近六旬，萬種識破。
兒孫更多，難替這箇。福來爭要，灾病自臥。
古今生滅，前程會麼。虛空賢聖，怎生謾那。
新愆不造，陰公饒過。日沒之光，息慮休何。
實心敬信，哩唆哩囉。波波劫劫，弗如閑坐。
從前失錯，悔恨摧挫。常行清善，勝施財貨。

又

四面青城，似列圍幘。佛仙隱處，眼界寬明。
未能達道，閑看真經。自然萬慧，覺了無生。
無為至行，無愛無憎。常清常淨，氣鍊神靈。
古今悟者，依此超昇。閑非閑是，耳畔休聽。
始終敬信，福德雙成。外如愚魯，亘貌惺惺。
清虛忘世，意厭浮榮。

又

衆生苦海，漂沉萬載。販骨如山，恩極變害。
人世忙忙、幾箇悟解，石爛松枯，亘靈常在。
身似浮漚，未了冤債。頓覺希夷，真忘欲愛。
命耀光圓，神昇天外。大道無形，古今弗壞。
積寶過斗，妙玄難買。出卻陽陰，一無罣礙。

二物沖和，自然交泰。養就胎仙，淨清沒賽。
永免去來，逍遙真快。水簾洞隱，飛泉千派。
松峰樂道，真居陽界。也無生老，亦無成敗。
昔遇王馬，中華曾拜。他年蓬島，相逢又再。
又

太上符籙，二十四階。道藏要妙，寶壇常開。
天元傳授，點化仙材。真修性命，偽養形骸。
迷沉六道，悟去無來。虛空賢聖，救世心哀。
清魂淨魄，抱守仙胎。理明萬慧，至闋真齋。
時時微妙，斡運三台。自然無作，平善無乖。
天心正法，不愛人財。弗造諸愆，能消舊災。
一頓通教，二氣難埋。三寶鍊成，四位安排。
五行之外，六出哈哈。七情陰盡，八卦明垓。
九天昇入，十極蓬萊。

又
得到七十，更有一紀。得盡天年，古今有幾。
頓修性命，好事無比。進真上仙，退道下鬼。
大達清通，無讚無毀。不侵利害，真無憂喜。
閑看三教，微通至理。出離苦海，神舟到彼。
累功積行，美之又美。

又
觀今視古，幾人肯悟。休論出家，且如龐許。
生在中華，道德難遇。父母之前，真本甚處。
認得希夷，倒顛烏兔。妙達自然，清平仙舉。
要修大藥，何方好住。洞天不遠，携雲閑去。
互靈不老，幻軀有數。命耀光圓，無來無去。

又
至道希夷，今古誰知。陰陽之外，覺妙幽微。
道離空色，無為應為。清真弗變，便是霄梯。
自然顛倒，運坎迎離。忘情保命，皓月無虧。
白雲來往，信任東西。要調赤鳳，真抱烏龜。
萬偽識破，外似憨癡。只揚人美，常搜己非。
頓忘憎愛，意沒高低。

又

真仙術用，靈龜調鳳。把握陰陽，虛無妙用。
萬景叢中，無靜無動。曾住京華，混世忘夢。
道德希夷，古今誰奉。一顆神珠，自然拈弄。
都監同監，上呈拙頌。道家清平，所慮辱寵。
大羅聖降，異香風送。

又

近醮人聽，戒葷身靜。苦己無私，得些功行。
若犯天條，年灾月病。應物忘塵，寸靈如鏡。
吏神暗察，念念心正。去憎盡愛，清通平等。
要免輪回，歸依賢聖。

又

巨海謙低，萬派清歸。至道無形，妙出毫眉。
湧泉智慧，得意忘知。頤真保命，今古誰依。
寂寥無變，便是霄梯。京華混世，獨樂希夷。
自然達理，無悟無迷。頓明三教，更有何疑。
藕在泥中，蓮出青泥。應化忘言，無為應為。
修行真俏，外貌如癡。氣神相見，結坎迎離。
世無肯省，卻隱清溪。周天十二，閑飲刀圭。
昔年雲步，曾歷關西。恰似童稚，白髮來催。
神仙未了，鬼使難追。鍊成魂魄，寶鑑無虧。
陰陽之外，烏兔常隨。任他人世，說是言非。
洞天不遠，到者實稀。萬愆俱泯，永免輪回。

又

知空塵去，無爭真悟。念道清平，拂盡愁慮。
愛者不愛，高真見許。覺性明常，寸無喜怒。
莫言非是，閑談今古。生在中華，早尋仙路。
忘情保命，清通子母。

〔贈道衆〕

辛酉歲下元，濱州放錄，立余為度師，余不從，酬贈。
聖經符籙，太上為師。五師假度，萬物無私。
深藏三寶，終始一時。古今仙賢，箇箇真慈。
道傳微妙，瞬目揚眉。磨開慧劍，靈鎮虵龜。
中邊一弗，達理無疑。常讚人美，只搜己非。
盡除我相，德歸謙卑。真平至行，抱一無離。

住行坐外，運坎迎離。知白守黑，不讓圍碁。
自然萬慧，明者實稀。靈丹一粒，罪病都醫。
修完性命，鬼使難追。真無喜怒，碧漢霄梯。
認得真容，勝禮牟尼。鍊成七寶，免販行屍。
救生拔死，閑樂希夷。天條莫犯，國法遵依。
了真道貌，似月無虧。隱光混濁，外若憨癡。
洞天吟詠，詩曲欣題。松前石畔，神飲刀圭。
因何厭世，無箇真依。休昧方寸，賢聖暗隨。
去惡忘貪，更沒災危。出離五道，免了披皮。
朝元路上，體掛仙衣。海變桑田，亘貌無衰。
陰陽之外，生滅難催。應為功德，福過須彌。
授傳敬信，下手休遲，清靜到頭，功有高低。
上昇天堂，下免陰司。世迷情愛，氣斷是誰。
如龐似許，永免輪回。

又

真人大師，未敢容易。久聞至德，清名無比。
廣積洪禧，昔年混世。福地洞天，也曾雲水。
礪石松前，烹鉛鍊已。內功預了，古今有幾。
頓悟歸依，蓬萊一會。

又

人間世愛，應景芬芳。仙家美景，四序有常。
覺花無謝，隱在中央，天香墜落，自然異香。
慧眸能見，別是重陽。蓬壺閬苑，不謝真光。
雲亭仙樂，不讓高堂。乘風要去，卻到仙鄉。
各全功行，慢慢休忙。

又

處玄到州，不要恁到。各各念道，始終常好。
會上每月，不得求告。三請不來，不要有懊。
卻生嗔怒，死參閻老。無罪歡樂，勝貪苦惱。
天元將盡，難逢正教。肯信余言，真遊蓬島。

又

甲辰登郡，黃籙重興。昌陽感應，晝見明星。
祖師預顯，下元文登。白龜蓮襯，真異分明。
資聖宮題，昇化南京。四友守墳，曾近上清。

同居五載，雲水閑行。天元將盡，未得真寧。
汞鉛鍊就，別有真形。

上敬奉三教道衆并述懷

萬經頓悟，清靜功夫。真要道成，至死如初。
寸靈明了，外貌若愚。夏涼冬暖，閑看仙書。
松筠石畔，自在清居。萬愆不造，舊業消除。
鍊成三寶，蛻下凡軀。趙卻輪回，昇入虛無。
大羅朝聖，永住天都。

又

自揣難當，廣惠道糧。我無功行，勸恁從長。
少貪忘欲，增福安康。田蠶要廣，悟壘省亡。
時時煎熬，日日無常。不修性命，金寶多藏。
惡業將去，財與兒郎。真心頓覺，倣倣丹陽。
救生拔死，德徧十方。厭居人世，昇入仙鄉。

又

子孫成行，大限難替。今古人間，悟者有幾。
苦海漂沉，無箇超彼。萬中未有，一人無毀。
心違道德，只爭名利。弗修性命，怎免下鬼。
去盡貪嗔，神仙活計。大限臨頭，猶然戀世。

又

名山書院，閑掛琴劍。萬卷聖經，忻時頻檢。
自然達理，了真靈驗。松峰霞洞，世偽好閃。
高臥礮石，清居永占。意想名利，難趨巔嶮。
古來烈士，磨開一點。迸出靈珠，現出光焰。
燒見亘容，道有頓漸。八卦微通，色空弗染。
揚人之美，醜惡卻掩。功行周圓，無思忘念。

又

未能出去，且如龐許。全家了道，名傳萬古。
意泯貪爭，認得烏兔。自然之道，倒顛子午。
達理明真，便知宗祖。頓覺真常，也無捨取。
真樂清平，玉皇仙舉。出離生滅，大羅天住。
功行未圓，志堅淡素。始終不變，聖賢來度。
三教高真，便是師父。

又

普勸諸公，先行孝道。無事筠軒，閑看莊老。
今古人間，幾箇明奧。覺了希夷，認得亘貌。
蓬萊雲路，行道須到。弗造萬愆，寸無苦惱。
意洽天心，出言妙教。不論他非，高真許好。
不測無常，修真宜早。得道成仙，免參閻老。

又

一別貴縣，十有三年。幻軀衰老，真未成仙。
行未八百，功過三千。三教歸一，弗論道禪。
見性成佛，鍊汞通鉛。天道無言，聖道暗傳。
上士飛昇，中下延全。生在中華，難遇天元。

又

昔年遊歷，曾到嵩陽。達磨面壁，九載真忘。
論大包天，微出毫芒。陰陽之外，趨了無常。
松峰霞洞，勝住高堂。壺天日月，晝夜偏長。
清平妙用，功行圓方。火坑出了，別有炎涼。

又

尋常交易，念道兩平。應有買賣，莫要相爭。
行在刀尺，功認斤星。真通好事，出語如經。
和睦孝順，勝似人情。言他醜惡，卻要休聽。
心崇至德，外應虛名。真生敬信，保命通靈。
抱道真常，免墮幽冥。他年歸去，蓬島遊行。

又

朝參暮禮，常爇名香。清平福德，勝論仙方。
戒殺生靈，合宅安康。悟道意閑，迷俗心忙。
不造陰罪，便見天堂。松筠為伴，四序炎涼。
瑤臺閭苑，要去休忘。真無罣礙，得到仙鄉。

又

無能無德，厚禮難當。遠遠相接，又獻瓊漿。
尊官二姓，共是重陽。功成名遂，卻慕仙鄉。
人間萬事，頓覺俱忘。道性真通，汞庫鉛房。
蓬萊雲路，別有清涼。

又

天道難言，命住光傳。休生愛欲，鍊就汞鉛。
出離物我，抱道通仙。行全八百，功滿三千。

靈峰洞外，閑對林泉。常餐淡素，意遠腥羶。
琴書為伴，高臥雲煙。他年歸去，獨步朝元。

又

明真之醮，所料緊要。薦拔先靈，各願管了。
休問使錢，共用多少。收支無私，置曆二道。
臨醮衆人，戒欲為妙。且遠腥羶，縱意壽夭。
吏神暗察，罪福非小。近醮朝真，不得喚叫。
高功道法。顯揚大教。所篆符簡，衆職明曉。
追薦文字，未有別料。百日之功，莫生虛矯。
季冬望後，要顯光耀。休分晝夜，俗事除勦。

〔辭馬姑〕

馬姑到東萊州近二載，滿郡奉道之家，各見敬愛。卻要去都下，所言有些小事未了。中秋旦後相辭，信筆數言，自知未達曰

大道無為，真應有為。無形有相，福行施為。
不造萬愆，頓覺真為。不貪萬有，物外清為。
不生萬惡，應化善為。不起萬憎，應化德為。
道闡萬理，應化賢為。世明萬信，應化經為。
金剛四句，應化禪為。周易造化，應化卦為。
道德五千，應化修為。十方三界，三教廣為。
萬法無分，天下敬為。上報四恩，無為不為。

又

無修有修，無為應為。無著無離，無大無微。
無憎無愛，無是無非。無增無減，無高無低。
無收無取，無悄無癡。無中應物，無慮無機。
自然顛倒，言東悟西。見喜卻怒，許省是迷。
道無形體，無想無知。真常無變，無妄無疑。
無來無去，霄漢之梯。無動無作，運坎迎離。
無情互貌，嬰姪相隨。無物之象，古今明稀。
藕在水中，蓮朵出泥。既超彼岸，丹陽教依。

又

真隱遼陽，敬奉丹陽。萬事無心，漸得道陽。
盡惡常善，達理明陽。寸無貪爭，體變真陽。
碧天青瑩，光顯太陽。寶光無缺，混合陰陽。
命清無漏，火鍊靈陽。自然顛倒，微妙通陽。

他年歸去，重禮重陽。

又

守道無愆，慧目觀天。無中妙有，汞結靈鉛。
行全八百，功了三千。傻猿縛住，迸出光圓。
沖和黍米，道意如淵。自然達理，雲水溪邊。
琴書作伴，自在修仙。冬藏雲洞，夏臥松軒。
欣時歌舞，靜看詩篇。携筇頂笠，終始真堅。
古今達者，清隱高賢。

又

昌陽石嶺，有塔善敬。茅屋仙居，禮參大聖。
道論陰陽，釋明見性。文宣五常，外應百行。
萬法千門，無分平等。盡除憎愛，真無罪病。
不犯天條，達理歸正，真齋真戒，身心清靜。
只修道德，利名休競。去惡沖和，忘情保命。
天瑩光圓，勝如入定。至妙希夷，絕其視聽。
古往今來，幾人頓省。賢聖虛空，化世應影。
金剛四句，善通敬頂。了一去朝，上清真境。

又

身似環墻，四面生光。無中明有，真悟丹陽。
妙通恍惚，自然真常。口應聲隨，俗念俱忘。
世無知音，幽闥潛藏。茅舍清居，勝住高堂。
蓬萊雲路，要去休忙。壺天妙景，晝夜非常。
花開不謝，閬苑仙鄉。海變松枯，永免丘荒。
養成道體，體掛雲裳。大羅歸去，朝現天皇。

又

方寸無塵，靈真如鏡。應物明通，至性保命。
調和道氣，念無罪病。苦處爭先，一切平等。
依此行持，便是功行。縛住心猿，勝似入定。
不著有無，俱忘動靜。憎愛是非，益真可聽。
美言多邪，清一多正。始終弗變，了真朝聖。

又

去惡善生，忘情命生。厭偽真生，意平德生。
心通慧生，見道無生。盡濁清生，陰盡陽生。
性定光生，敬參應生。大慈救生，道用微生。

又

既慕林泉，耕透靈田。苦形心盡，保養真鉛。
松前石畔，趁了熬煎。貪爭遠卻，達道通仙。
隱居世外，高臥雲軒。自然應變；妙慧觀天。
理明釋藏，不讓參揮。閑窮三教，得意忘言。

又

上士無爭，應物常平。不貪外寶，道合真靈。
理明正教，敬信來聽。方圓隨順，救死哀生。
有心忘世，無意身榮。六銖天賜，換卻偽形。
完全功行，勝殫聲名。了真歸去，朝現三清。

又

萬事知空，頓忘人我。外應福行，無為成果。
真通柔弱，妙明降火。靈耀常看。金關玉鎖。
自然有作，住行坐臥。剔開道眼，進出珠顆。
鬧裏無心，性如蓮朵。理達希夷，古今幾箇。
體變純陽，蛻形無墮。

又

身混世境，不動真靜，斡運丙陽，自然煥炳。
道慧通天，寶光如鏡。應物德全，達無罪病。
妙覺真常，破妄歸正。氣神相見，命住性定。
水善清柔，貫透剛硬。上士無爭，非是莫聽。
盡除憎愛，寸靈平等。萬萬學道，一二頓省。
弗思美膳，乞覓餘剩。貧裏藏真，他年朝聖。

又

清靜真功，應物微通，身似藕根，心是蓮宮。
白雲出岫，自在空中。妄言濁氣，口應如聾。
至明樞要，不與世同。弗殫有無，道性和沖。
像猿既定，伏住虎龍。自然了了，彼岸靈峰。
養成三寶，外若貧窮。他年厭偽，閑伴森松。

又

昇降敬奉，莫動人衆。只據會下，錢少為從。
各家艱難，依平儉用。天人暗察，心休錯用。
無私福多，有愆罪重。

又

節欲少病，真平積行。念道忘塵，心猿縛定。
萬鎰黃金，難買性命。三教歸依，慧光漸瑩。
倣倣許龐，真昇朝聖。

又

觀名集仙，上敬九天。位列三清，法離二邊。
藏經萬達，化愚變賢。自然之道，鍊汞烹鉛。
行全八百，功了三千。

又

道念寬慈，世智克狠。積業如山，陰公怎忍。
惡病纏身，鬼使喚緊。罪沉幽冥，冤對前引。

又

世偽非堅，莫縱心猿。修真出有，免了熬煎。
清平樂道，舉意通天。常善鍊汞，泯情烹鉛。
行全八百，功累三千。古今達士，依想昇仙。

又

念道忘俗，命全無欲。萬愆不造，自然清福。
松峰樂性，調和金玉。寶光無缺，烏生三足。
希夷明妙，霞友相逐。

又

失墮傍生，得通賢聖。迷沉濁穢，悟全清靜。
碧天似水，象明如鏡。窮盡千金，難醫心病。
服了刀圭，道洽性命。

又

但見女男，如觀父母。意順三毒，身受萬苦。
知空厭世，雲霞為侶。出了陰陽，性超寒暑。
氣結神靈，真明千古。道樂清平。無為仙舉。

四言絕句

治政清通，為官忠孝。節欲身安，他年蓬島。

又

有緣再遇，重到東州。外應因果，內隱真修。

又

人到如見，難當敬獻。念道思真，閑看經卷。

又

己未新秋，處暑清旦。臥化超昇，真歸霄漢。

又
尊體安樂，別有期約。忘塵念道，真通靈藥。
又
無內修功，應有積行。道意通天，一真得定。
又
恁助柴薪，我管功匠。磚瓦燒成，再去重訪。
又
既悟修仙，觸處無煙。心清得道，苦志常堅。
又
修行日用，去除憎愛。降伏心意，應變通解。
又
掩非和衆，清通日用。要全性命，傻猿莫動。
又
氣清無我，妙用真火。燒見亘初，結成金果。
又
多僧傷行，多事傷神。多欲傷命，多迷亂真。
又
事少心靈，念少無拘。明少多愚，濁少通書。
又
妙道希夷，無著無離。自然明了，賢聖皆知。

仙樂集卷之三竟

仙樂集卷之四

神山無為應緣長生子劉處玄造

詞

上節使同知泊官衆道友并口號
物物心休道眼開，胎仙養就泛瓊盃。
自然頓醒陰陽外，跨鶴真昇難再來。
江神子
道心不與世心同。悟知空，物塵容。
達理明真，應變自然通。
憎愛是非俱不染，遊福地，伴松峰。
鍊成鶴體碧霄中。任西東，訪蓬宮。
出了陰陽，仙壽永無窮。
海變松枯真不朽，超三界，從仙翁。

今日瓊林花正開，十分真樂飲三盃。

逍遙酩酊何方去，蓬島仙鄉去又來。

上平西四首

想百年，如一夢，幾多時。妙希夷、只是些兒。

諸公肯信，日常萬物意無私。住行坐臥真平等，

應變真慈。崇仙道，明仙理，通仙妙，謝仙師。

在靈峰、閑採靈芝。洞天清隱，周天十二坎迎離。

三田功滿朝元去，卻蛻行屍。

又

到仙園，松筠翠，牡丹紅。樂清歡、幾箇人同。

且忘世夢，轉頭萬事一場空。月圓月缺如憂喜，悟愛心慵。

真閑好，得閑趣，通閑妙，覺閑通。運卦爻、識祖明宗。

許君龐氏，了然先到碧霄中。諸公依此崇真道，蓬島相逢。

又

戀恩親，恩生害，死難逃。氣不來、身臥荒郊。改頭換面，

輪回販骨幾千遭。世華非堅如石火，火宅囚牢。

任雲水，登雲路，遊雲外，翫雲濤。厭錦衣、喜掛麻袍。

清平道德，修完性命隱蓬茅。他年蛻殼朝賢聖，名列仙曹。

又

想人生，老與少，似春秋。恰幼年、卻變白頭。

莫爭空假，無常氣斷臥荒丘。大都三萬六千日，多病多愁。

崇真道，敬真聖，明真理，了真修。侍二尊、至孝全周。

全家拔宅，功成同去到瀛洲。出離生死無來去，閬苑清遊。

滿庭芳八首

三十年間，幾番寵辱，細思往事慵言。也曾牒發，曾受帝王宣。

今日山村且住，他時去、高臥雲煙。洞天隱，松峰之畔，保命是修仙。

無愆。全道德，自然達理，鍊汞烹鉛。未功圓行足，閑對林泉。

真樂琴書為伴，忘塵世、趁了熬煎。逍遙好，蛻形真去，昇入大羅天。

又

遇七修齋，庚申餐素，禮參旦望行香。時時念道，世夢頓然忘。

三教經書為伴，真閑處、勝似貪忙。迷雲散，一輪皓月，無缺照無方。

從長。明大道，暗中積行，上達穹蒼。做許龐歸去，萬古名揚。

未往蓬壺閬苑，筠軒坐、吟笑潛藏。功成去，陰公難喚，跨鶴到仙鄉。

又

今世榮光，前生福行，悟來更好真修。外歡未盡，念動意多憂。
清淡平常道樂，筠軒坐、至理頻搜。真明了，碧天瑩淨，命耀似新秋。
休休。崇道德，清廉治政，應變全周。待功成名遂，霞洞雲遊。
琴劍仙經為伴，蛻形去、真上雲頭。如龐許，全家拔宅，永永住瀛洲。
許真君全家拔宅昇天，龐居士全家坐脫立亡去。

又攢三拆字

□□馮曠，□□仙住，□□鉛汞成形。□□罪盡，神氣自然靈。
□□天明萬象，地淵涌、□□泉平。靜恍惚，□□無缺，□□命須停。
□□誠了了，□□蓬隱，勝似華榮。□□若出戶，眼界寬青。
□□林間松檜，洞深處、□□看經。□□覩，□□分正，塵斷碧霄行。

又藏頭拆字

□寸明真，□靈通慧，□無罣礙清涼。□華混世，人笑似風狂。
□祖丘劉譚馬，□消滅、萬慮俱忘。□猿住，□通道德，豈肯外昭彰。
□分。清靜妙，□嬰男姪，雲路休忙。□虛無造化，汞結鉛光。
□兀騰騰飄逸，販骨趨□了無常。□袍侶，□公甘鎮，詩挈滿庭芳。

又

三載施為，十全八九，有些未及功圓。不曾行疏，所惠自然錢。
也不修齋動衆，一麻麥、任潤靈田。非外覓，無中造化，有口妙難言。
道傳。明易象，倒顛光運，天地之先。覺無形應物，非嘖中邊。
清靜金嬰玉姪，虛無裏、汞結靈鉛。六銖掛，大羅歸去，重受玉皇宣。

又

體掛雲衣，身如布素，應為莫厭清貧。道無形象，大悟裏頭真。
憎愛心無有德，俱讚美、歸順良因。洪禧至，閑看法教，松竹每為鄰。
真親。全性命，明今達古，混世忘塵。若依余常善，永免沉淪。
蓬島仙鄉咫尺，蛻形去、現出真神。碧霄外，大羅天上，無缺寶光新。

又

萬惡心除，千思意泯，自然罪病消亡。寸靈念道，動靜兩俱忘。
清志如龐似許，任雲水、到處為鄉。仙家好，茅齋幽闥，勝似住高堂。
無忙。看古教，頓明至理，上運三光。也不須晝夜，數墨尋行。
養就真鉛真汞，蛻形去、天地難量。碧霄外，大羅歸去，重禮馬丹陽。

神光燦(聲聲慢)三首

處玄稽首，庫使尊官，一別又過三年。渴仰之懷路遙，未及人專。
辛酉孟秋仍熱，遣來人、復去晝傳。詢動靜，知豐衍職任，不久將遷。
他日功成厭世，傲淵明樂道，閑伴林泉。自在無拘笑吟，洞外松前。

養就真鉛真汞，恁時節、功了三千。朝元去，現真形獨步雲軒。

又

處玄拜上，道錄高功，日照別後難逢。渴仰之懷甚時，得覩仙容。
即辰仲冬辛酉，急焚香、跪領開封。清河德，又行緣闡醮，敬信無窮。
光徧十方真了，去大羅朝聖，昇入高穹。體掛雲裳萬里，要到乘風。
這番出離生滅，任往來、跨虎騎龍。天地外，想古今幾箇真同。

又

處玄稽首，月帔張唐二公，別後思量。倏忽年餘邇聞，卻住天長。
常記講師靜位，說關西、作醮歧陽。香花引，那郝公見道，大晒重陽。
便繼處玄亂道，酌江月一句，寸念難忘。踏盡鐵鞋難覓，恍惚靈光。
自然無中妙有，道希夷、無物包藏。功成去，上大羅天賜玳瑁。

酌江月(念奴嬌)五首

古今販骨，想生來死去，榮枯多少。百載光陰四序逼，不覺形容衰老。
世偽浮華，轉頭如夢，到底成虛矯。無生一念，念道真明達了。
最好福地清居，依山臨水，自在携筇到。占得真歡霞洞隱，無事閑看聖教

功行周圓，完全性命，勝似重修醮。鍊成道體，別有金書來詔。

又

隴西余慮，到濰陽秦臺，空來空去。貴府推官同太守，相訪臨歸叮囑。
壬戌新正，欲邀到府，未見先生許。處玄重答，這裏元宵亦做。
四序孰悟三元，天官賜福，下救陰靈苦。生在中華崇道德，世讚名傳千古

大醮洪禧，青詞奏聖，感應應難遇。文山作醮，白龜蓮襯王祖。

又

壽過彭祖，更官高一品，石崇貴富。古往今來人世事，覺了不堪重慮。
歸去淵明，乘舟范蠡，先已超昇去。真通道德，趨卻死沉陰路。
雲步閩苑蓬山，仙鄉不夜，各有逍遙所。過了天元無上道，千載難逢難遇

石火光陰，浮漚生滅，飛走烏隨兔。速修性命，暗有賢聖提汝。

又

碧軒闌坐，頓忘言、閑了詩書千卷。松徑携筇真念道，妙奧天機深遠。
物外人間，京華雲洞，慧眼開時見。有無俱泯，吟笑浮生不辯。
拔宅龐許飛昇，大羅歸去，販骨死生免。不夜仙鄉無苦惱，閩苑瑤池清宴

海變松枯，互容弗老，世偽真無羨。六銖衣掛，復去朝元重現。

又

厭居人世，似孤雲飄逸，鶴昇霄漢。自在無拘空外去，撒手直超彼岸。

到處為家，琴書為伴，信筆閑吟嘆。洞天高臥，任他人笑懶慢。

夏近百尺森松，水簾響曉，飛入龍泉澗。渴飲霞漿仙會處，童稚唇歌舌誕

。 趁了輪回，完全性命，迷者應難赴。忘名絕利，一任人非人讚。

水龍吟

此時辛酉初冬，下元望夜逢甘雨。麥苗滋長，深根固蒂，多歡少慮。

念道無災禍，聖賢佑、衆生無苦遇。天元將末，群仙慶會，功全行，

朝元去。別有天宮寶所，了真修、得昇雲路。六銖衣掛，清平福救，

九玄七祖。歸去無生老，自然性、明今達古。各全家奉道始終，莫變管如

龐許。

滿路花

霜林飄赤葉，徧地涌黃金。賓鴻離塞北，足聲音。淵明歸去，

獨酌樂清吟。醕酎真歡笑，高臥雲山，忘塵世，偽難侵。

頓然覺，應物無心。道妙自然深。壺中仙景異，外休尋。

四時花放，論古更明今。要到乘風去，三島十洲，蓬萊別有高岑。

行香子二首

歷徧人間，卻羨名山。洞天清、坐聽潺湲。萬株松檜，千頃雲煙。

好伴琴書，真念道，樂安閑。養就靈鉛，命耀光圓。行功成、蓬島為仙。

出離生滅，萬古相傳。既免輪回，六銖掛，去朝元。

又

金鼎生光，常爇真香。寶瓶花、四序芬芳。虛空賢聖，咫尺西方。

上敬三清，明三耀，悟三皇。上古人淳，厚實佳祥。性通天、與道無妨。

暗行平等，柔勝剛強。意似仙真，全仙行，往仙鄉。

山亭柳

退道者墮，進道者昇

退道愚生，意亂心生。喪命盡貪生。不畏神明察日，千愆萬過迷生。

死墮鄴都苦苦，苦盡傍生。進道清真忘世夢，閑看聖教似書生。

達理悟修生。氣結神靈異，自然有、霞彩光生。寶鑑碧霄晃耀，真箇先生

。 驀山溪六首

七旬相近，正好忘塵世。世夢幾時休，道德修、勝爭薄利。

恩山愛海，火院鎮燒身，聞身健，覓清涼，一任迷人毀。
閑看三教，造化明周易。達理妙通天，四相泯、無憂無喜。
洞天高臥，自在鍊真丹，他年去，上青霄，始現無為異。

又

人間華麗，恰似風前燭。萬事轉頭空，世外隱、仙家清福。
靈峰霞洞，四序不知秋，松為伴，竹為鄰，閑唱無生曲。
琴書樂性，道用調金木。鍊出九霄身，六銖掛、朝元去速。
永無生老，昇入大羅天，任巨海，變桑田，真與神仙逐。

又

人間萬事，識破真歸笑。恩愛與塵情，譬無常、般般是了。
浮漚幻體，生滅幾時休，忘世夢，去貪爭，違道真明曉。
微光覺照，應變通深妙。命住性通天，有自然、無窮降耀。
陽純陰盡，蛻殼免沉淪，遊閬苑，翫瑤池，玉帝金書詔。

又

玉峰頂上，知有田三段。壬潤長黃芽，便萬斛、珠酬弗換。
一麻一麥，服了自然安，修性命，體延年，別近雲霞伴。
陰陽之外，天地難拘管。得道免輪回，厭世隱，神堂古觀。
無為功行，真了去朝元，六銖掛，現真形，三島十洲翫。

又

紅蓮池畔，不讓遊山景。鬧裏卻無心，身似藕、出泥花靜。
壺天妙趣，別有四時春，真應物，寶光明，今古誰人省。
真行道德，顯化邪歸正。口應更聲隨，只是要、寸靈無病。
貪爭意盡，道眼自然開，來世外，混京華，積行常平等。

又

王徐道友，今日重相別。甚日再相逢，到來歲、新秋重歇，
一年一到，百載幾番來，且暫坐，意休忙，烏兔生還滅。
人間寵辱，辱似圓光缺。少喜慮多憂，想憎愛、是非慵說。
天元將盡，奉勸速修真，遊洞府，隱松峰，無事看莊列。

玉堂春二首

道德清平，賢者真易化。世夢知空，幾人放下。厭濁清居，
周天運爻卦。身是行菴到處家。養就圓光，碧虛無執，
把萬里清澄、自然懸掛。物外逍遙，瀟瀟真脫洒。悟者超昇學者麻。

又

仙觀靈虛，二年來來去。破了重修，星冠養素。應有真無，

齋科救萬苦。達理忘言清靜居。道釋儒寬，通為三教，
戶外應五常，敬謙賢許。四相心無，自然樂有餘。出了陰陽現互初。
踏雲行(踏莎行)九首

崑辛酉歲仲冬十有二日，經過大原宅，清旦門外忽觀東南彩霞。信筆。
遙望東南，彩光分朗。忽然見了濱州往。醮緣感應仗高真，
昔年曾有劉高尚。德徧十方，度人無量。萬清萬善理朋廣。
他時歸去到蓬萊，無為道妙無虛妄。

又

七十年光，五千二萬。隄防不測無常限。假軀拋下落黃泉，
平生應變時間讚。頓覺靈峰，真超彼岸。蛻形歸去昇雲漢。
天元過了去無來，踏莎行者人難趕。

又

聖道難逢，真修易遇。自然之理明今古。死生販骨幾千遭，
這番了了無來去。蓬島仙鄉，亘靈無苦。朝元路上高真許。
松枯海變永常存，他年萬祖離陰府。

又

子母相逢，自然明道。出離物殼無生老。茅齋松竹每為鄰，
清居幽閨仙家好。敬信高明，真歡無惱。各人性命修宜早。
功成行滿免輪回，蛻形跨鶴歸蓬島。

又

去歲周亭，今年重到。光陰似箭催人老。世空識破好休心，
修行下手志宜早。不肯忘情，將來悔懊。松峰樂道隨緣飽。
無中鍊就汞和鉛，携雲跨鶴歸蓬島。

又

兒女金枷，愛情玉杻。火坑牢獄身如囚。迷迷到了似春蠶，
疾些出離無中守。晝夜忙忙，烏飛兔走。浮漚生滅形難久。
速修性命免輪回，完全功行蓬瀛友。

又

亂性糟漿，頤神玉液。莫迷有有無中覓。重樓十二望蓬萊，
慧眸明處光無極。真樂陶陶，洞天遊歷。道靈今古幾人識。
擔雲信步入丹霄，大羅歸去無為職。

又

到處為家，鶉居無戀。要行便去雲遊轉。陰陽之外物難拘，
長安咫尺真非遠。道樂希夷，死生永免。亘初一點光如電。

自然照耀晃虛無，命清無缺成修鍊。

又

一別三年，重遊此地。雲菴寂闕忘心意。有時忻則看仙經，自然理達真明異。真樂希夷，道尊德貴。俱捐無有忘憂喜。洞天清隱混囂塵，要登雲路先超彼。

惜黃花三首

衆生萬過，有天來大。覺世夢知空，莫爭人我。應變愛憎，無競無灾禍。眼前事，頓明識破。敬道修因果，顛猿緊鎖。得自然真慧，住行坐臥。達理了，仙經物外靈無墮。隱洞天，古今幾箇。

又

天元將盡，去年卦盡。這世夢冤親，何時是盡。三寸不來休，卻變骷髏盡。到如斯，俗念心盡。道靈真無盡，忘機業盡。覺萬慧千通，頓然明盡。外貌似憨癡，吟笑風燈盡。樂無極，任他物盡。

又

大翁出去，隨家店住。且只似昔年，混俗龐許。食肉愛生靈，飲酒休亂做。肯忘貪，閑論今古。仙家樂處，逍遙雲路。隱世外修性，金烏隨兔。行就訪蓬山，功了離塵所。蛻凡形，禮丹陽父。

青杏兒三首

九月季秋涼。謝尊官、重獻霞漿。難當厚禮重重愛，世中名利，貪爭俗慮，身坐心忙。道化怕無常。三十年、總敬丹陽。東萊滿郡無疑妄，天元慶會，這番歸去，朝現天皇。

又

念道玉漿多。得真歡、大笑呵呵。自然醕酌逍遙快，依山臨水，雲霞洞外，忻後高歌。世景急如梭。戀恩山、灑灑波波。若肯回頭歸真一，烹鉛鍊汞，功成行滿，昇入煙羅。

又

迷者似河沙。想世間、學者如麻。萬中敬信無一悟，觀今視古，浮生濁夢，箇箇都差。達了莫矜誇。訪洞天、閑臥煙霞。

他年歸去方知得，瑤臺閬苑，神仙樂處，四序仙花。

武陵春二首

遙望崗山山正好，瑩瑩正芬芳。佳節春溫春晝長，最好泛霞漿。
酩酊歌歡忘世慮，吟笑勝輕狂。來往仙鄉住道鄉，過此慶重陽。

又

辛酉仲春遊坎上，終日坐春園。異景奇葩在目前，樹下勝筠軒。
世夢知空且放下，自在似真仙。美醞開樽會衆賢，樂道謝高天。

感皇恩二首

道釋與儒門，真通法海。易妙陰陽外，自然解。

金剛至理，頓覺無爭泯愛。五千玄言奧，夷明大。

微光運轉，結成雯蓋。霞輝常照體，何罣礙。

松枯石爛，互貌古今真在。他年功行滿，昇仙界。

又

聖觀號天長，星冠雲服。養成金玉體，真無朽。

信知大道，自然無中明有。世華心不戀，遊王屋。

外貧保命，隱真居陋。亘初無相貌，勝豐厚。

桑田海變，這箇無形堅久。暗祝吾皇德，齊天壽。

望遠行

令子根苗裔，雲水通行步。頓覺了，希夷微妙明千古。

去塵寰歷徧，看來都無伴侶。世人愛不愛，高真許。

達道完性命，永免輪回苦。隱福地，松峰霞洞自在處。

待養就、金鉛玉汞，真無濁慮。六銖掛，始應過三清舉。

定風波四首

臨醮諸公戒行清，動天感應福非輕。壬潤瓊田農盡喜，秋成。

穀田珠長豆苗生。要報天恩崇道德，隨緣知足莫相爭。

日一望焚香餐素膳，無憎。意平出語似仙經。

又

甘雨及時貴似油，今朝歡樂便無愁。明夜耕田野外唱，嗔牛。

動鞭輕打勝余修。過了天元難積行，一麻一麥寸中收。

養就姹嬰雲外去，優遊。命光圓若月新秋。

又

月一焚香望日齋，持些禁戒自消災。甲子庚申逢七記，開懷。

吏神暗察應時來。清靜身心無病苦，頤真保命運三台。

功行周圓何處去，哈哈。携雲跨鶴去蓬萊。

又

癸戶雲封運卦爻，剔開靈竅虎龍交。卯上行來真見酉，崑高。
金翁輪線釣瓊鼈。道德清通明法海，萬光澄現九天高。
造化自然神運轉，難包。古今達者列仙曹。

望蓬萊(望江南)六首

周亭去，莊裏又相邀。道念常如相見悟，天元覺了死生超。萬業頓明消。
洪禧至，寶鑑顯彰昭。三界十方明徹了，何顛水向火中燒。得道未逍遙。

又

近中壽，意望百年期。萬事轉頭都一夢，兩般罪福緊相隨。念道聖賢知。
性命達，今古世間稀。了了不生真不滅，自然結就坎和離。休覓上天梯。

又

清河喜，道錄是高功。已在道門三十載，秦臺辛酉又相逢。順化善緣從。
他年去，昇入大羅中。體掛六銖朝至聖，這回永住九陽宮。要到便乘風。

又

會首到，太守便相邀。請至藏春堂裏坐，恁時早晚旦清朝。真福道能消。
欲近醮，速去似風飄。道士靈虛分一半，小師同到應焚燒。賢聖在丹霄。

又

形如鶴，性耀似孤雲。自在空中無罣礙，來來去去意無塵。世外樂天真。
大成拜，三教理超群。結就丹腸蓬島去，仙鄉別有洞天春。道象古今新。

又

修行好，應化學齋科。旦望焚香參禮聖，晝閑夜靜衆吟哦。智慧性明多。
無為理，萬法弗能過。外行內功真了了，鍊成鉛汞出娑婆。得道免閻羅。

仙樂集卷之四竟

仙樂集卷之五

神山無為應緣長生子劉處玄造

五言絕句頌一百九十首

輪回幾萬遭，去愛命清逃。造化無中有，沖和離坎交。
物外逃生死，常如初時志。通真全妙慧，可稱修仙子。
性光命似油，微妙闔中搜。照見無虛妄，碧天皓月秋。
輪回生死大，覺悟通法海。舉意合真經，混塵明世外。
清通神氣靈，上士悟無爭。達理全功行，碧霄雲外行。
得道自然真，青蓮出垢津。罣礙心無礙，蛻形身外身。
舉意除憎愛，形衰真性在。頓明道眼開，聖經自然解。
道覺明真趣，慧通達萬古。自然清志堅，性命光圓去。

日用縛顛猿，虛心微妙傳。別開真道眼，清意見靈仙。
清柔神氣靈，濁惡性無明。悟道超生滅，真歸天外行。
善清脫生死，天瑩萬光明。真通全妙理，歸去踏雲行。
正理掩他非，道通霄漢梯。應緣無罣礙，功了行無虧。
美色悟骷髏，知空意莫留。頓明性命大，真了洞天遊。
到岸了無生，沖和道性靈。命住圓成了，夷然功行盈。
善覺不爭空，忘塵見道功。微通三寶結，金光射玉峰。
輪回生死大，保命忘世愛。雲水伴松峰，慧靈觀自在。
無我微光覺，道成免販殼。理明至德全，靈象無中握。
日用六根清，悟真道理明。自然全萬行，歸去碧霄行。
他非似已過，謙下真明我。降火鍊金鉛，行全無為果。
物盡道真常，夷清至德長。忘言明妙理，命住結丹光。
德全憎愛盡，天道難詢問。覺了自然通，陽純雲路近。
守道真無罪，迷難悟則易。天青萬象明，昇仙免下鬼。
輪回萬萬遭，見道死生逃。出了陰陽殼，沖和離坎交。
大悟不爭空，至明萬事容。隱仙真厭濁，洞外伴森松。
清真悟死生，保命氣神靈。行通全萬善，功了到蓬瀛。
違道履薄冰，愛迷性命沉。傻猿擒縛住，積行聖賢欽。
輪回生死大，不悟恩生害。頓覺洞天遊，理明通法海。
日用寸無愆，始終仗志堅。陽純靈耀燦，無缺十分圓。
無爭至德全，道覺妙微傳。應變真明了，蛻形蓬島仙。
見道性無爭，沖和萬慧明。自然全至行，厭世洞天行。
進真入碧虛，退志有酆都。莫退也休進，遊山混世居。
明真一遇仙，日用汞烹鉛，達了清平行，道玄天地先。
得道不爭空，混塵衆垢容。他年真厭世，洞外伴森松。
清虛志要堅，世外好修仙。道免輪回苦，真昇萬古傳。
物盡真無死，清通道慧生。自然明萬化，忘世應緣平。
保命通真福，通天開慧目。明元道寶全，真去朝元速。
靈峰超苦海，覺悟真明解。得意卻忘言，道成天地外。
明知世夢虛，幾箇出塵居。達理明天道，真通今古書。
守道悟完顏，自然慧目看。靈虛真弗朽，清徹古長安。
道覺超生死，頓明明奧旨。清志有始終，樞機賢聖賜。
忘貪去罪病，達理修性命。隱道伴松峰，他年朝至聖。
輪回萬萬遭，明道死生逃。清命圓無缺，變通運卦爻。

日用覺清通，無爭萬事容。真常明至道，歸去與仙同。
出塵清志堅，道覺養三田。長就靈苗了，真光麻麥傳。
通微道眼開，真了到蓬萊。物外超生死，亘靈沒地理。
頓悟樂希夷，樞機泯見知。天青萬象顯，祥耀透簾幃。
正理悟清平，自然盡愛憎。道明全至行，蛻殼現真形。
念道真無罪，新愆不造異。清通合聖經，保命神超彼。
柔弱氣神靈，松峰之下行。了仙隱福地，達理行功成。
了真清一志，得道超生死。三寶變純陽，昇仙名達士。
清虛悟性命，去住如對聖。厭世洞天遊，隱真積至行。
女男如父母，正念聖賢許。真靜姹嬰歡，道成救七祖。
洞天四面青，雲外列圍幃。松峰墮石坐，無事誦仙經。
四假似環菴，翠煙萬頃貪。靈龜隨皓鶴，伴我共成三。
常善氣清深，沖和無垢侵。靈珠明道體，結就水中金。
苦形欲念忘，清命免無常。守道通仙福，真明現寶光。
日用愛憎無，超塵入碧虛。真常全道德，歸去到仙都。
正理悟通經，天青道象明。意清祥耀燦，照見亘初靈。
堅志不爭空，真明萬慧通。養成無價寶，現出亘初容。
妙道微明用，靜通光運動。氣神相見靈，意厭浮生夢。
理明達萬古，清志真仙舉。蟬蛻兔輪回，雲歸朝聖主。
萬古死生大，古今幾箇解。清虛了性命，海變松枯在。
守清神氣靈，道理自然明。萬行真平了，語通合聖經。
萬物陰陽外，道堅真不壞。謙清上善歸，應變通元海。
飽暖身閑意，苦形降伏易。命住道通真，陽純免下鬼。
萬劫落輪回，頓明霄漢梯。命全性耀燦，雲步樂希夷。
真通萬慮忘，得道免無常。物外超生死，碧虛現寶光。
道用縛傻猿，形忘真自然。微通祥耀燦，射透九重天。
正理應方圓，道通真涌泉，闡明全萬善，達了行功圓。
抱道通生路，心死命光住。氣神相見靈，至理明千古。
覺了陰陽外，至真明道大。命清無滅生，厭世昇仙界。
清志有始終，明知世愛空。神舟超彼岸，雲步出靈峰。
明我悟謙通，混元虎逐龍。自然三寶結，真了與仙同。
得道免輪回，靈峰霄漢梯。洞天修性命，今古幾人歸。
四假似浮漚，真明月正秋。人牛都不見，光耀照山頭。
限到變骷髏，知空一念休。命生免下鬼，了道去瀛洲。

出有無生死，達理明真士。清善始終志，微妙靈中賜。
微通道眼開，覺了見如來。無生路上去，雲步到蓬萊。
雲步到微通，照明似燭紅。世華真拂盡，茶味爽靈容。
日用善清通，住行坐臥功。周天運降火，光照虎隨龍。
萬愆心斷絕，性似中秋月。保命隱松峰，無事看莊列。
日月頓無常，二輪飛走忙。傻猿縛得住，真去從丹陽。
道通明性命，意定真清靜。有志免輪回，仙鄉咫尺近。
進道死無怕，如蟬脫下假。都了上青霄，清聲寶無價。
順真無憎愛，萬清通法海。虛明道理解，應緣無罣礙。
心靜至真靈，真常道眼明。自然通萬慧，舉意合仙經。
垢盡道明真，沖和氣養神。清通為日用，命外更無親。
正趣覺通明，命清神氣靈。自然全道慧，應有行功成。
大悟不爭空，混塵衆垢容。清平全道德，厭世隱靈峰。
念動想骷髏，真明鉛汞收。道成別有體，蛻殼上雲頭。
謙柔和氣清，無濁命光停。達理全功行，應塵泯愛憎。
頓覺明真我，周天運降火。燒見黃金體，道證無為果。
世外不爭空，身青如萬松。潺湲通似性，道了虎隨龍。
居山遠是非，今古幾人依。得道無生死，命圓霄漢梯。
迷著似燈蛾，油窩焦爛多。孤雲伴野鶴，自在出娑婆。
至德愛憎無，真平萬病除。了必三寶結，道達物難拘。
擒猿志要堅，意定汞明鉛。生滅輪回免，大羅歸去仙。
真清保性命，垢盡如明鏡。照耀自然光，蛻形朝至聖。
心死性光生，忘情覺命停。道成別有體，真去自然昇。
無生泯萬愆，盡愛命光圓。柔弱氣神定，真通道德全。
去除物我心，日用理幽深。覺了真明達，陽純神鬼欽。
覺悟不爭空，他非應變容。自然全福行，真了到蟾官。
物盡道光生，天青寶鑑明。命清圓弗缺，應變自然靈。
販骨死生大，了真通世外。道成別有體，海變松枯在。
守真覺道安，達理悟雙關。微妙通顛倒，垂光鍊大丹。
出家不管家，混俗心無俗。動靜兩俱忘，道通消三毒。
氣降至神靈，忘情覺命清。自然三寶結，達理行功成。
修行搜已過，意定勝打坐。世外伴松峰，志堅成道果。
無爭全上士，抱道憑清志。動靜兩忘常，了真無老死。
苦形濁念無，世夢轉頭虛。清靜調嬰姪，雲歸蓬島居。

通善氣神和，去憎道行多。慧靈天地外，萬偽弗能過。
達道自然明，清平功行盈。貪爭心意盡，養就氣精神。
販骨死生大，忘塵通世外。命清寶鑑圓，抱道真光在。
交錢收領契，依理成交易。未足寫文會，代余便去稅。
大悟不爭我，德全無上果。周天十二通，丹結運真火。
超塵遠生死，性定自然靈。命住光無缺，理通應變明。
道明真悟堅，空色兩俱捐。達了忘塵慮，人間自在仙。
愛者卻如冤，人間第一賢。許龐拔宅去，雞犬從昇天。
大悟性無爭，沖和覺慧明。命清陽耀燦，應變自然平。
厭濁洞天居，了真達古書。清通全萬慧，雲水樂無餘。
無我覺真明，沖和神氣靈。自然金耀燦，道達出陽陰。
迷陰蛾戀燈，就死入油烹。形似丹霄鶴，蓬萊雲路行。
身若草頭珠，頓明世偽虛。萬年松檜下，閑看古賢書。
真明道眼開，清意性無災。趨了無邊業，超昇去弗來。
形病真無病，修行清保命。道成身外身，真了朝仙聖。
天瑩千光懸，心清見本真。寶光圓不缺，命住兩全成。
道全性命大，至理深如海。頓明物我忘，古今幾箇解。
應塵似水平，達道意無憎。養就真三寶，雲歸朝上清。
善光明道禧，世外樂希夷。達理通天行，了真霄漢梯。
蛾燈愛是癡，清命月無虧。下鬼上仙路，昇沉悟與迷。
修真要堅志，學道終如始。虛空賢聖知，性命超生死。
混世隱名山，俱忘動靜安。真常性弗變，跳出死生關。
身閑雜念多，迷偽戀燈蛾。早悟雲邊鶴，飛昇入大羅。
念道真無病，住行如對聖。清平至德全，蛻殼光無映。
大道本無修，隨緣莫外求。命全無價寶，真去列仙儔。
正理離中邊，性如出水蓮。碧天雲散盡，秋夜寶光圓。
忘塵覺性明，悟理洽仙經。命耀圓無缺，自然遠死生。
常善縛心猿，真通結汞鉛。道成別有體，蛻殼去昇仙。
敬道了真修，無歡意沒愁。筠軒看古教，達理行功周。
趨免恩生害，頓明性命大。黍珠光運轉，海變松枯在。
悟道不爭空，真明萬偽容。自然全上善，應變行功通。
美貌想骷髏，善清鉛汞修。道全真弗朽，歸去上雲頭。
知空清志堅，愛者卻如冤。蛾戀燈光死，雲閑鶴遇仙。
俗念我人無，真通性不愚。養成全玉體，換了這形軀。

大見悟無爭，沖和神氣靈。清平全至德，真去似飛星。
謙清至德歸，雲水任東西。道性明樞要，自然結坎離。
苦體色心消，鬧中悟寂寥。真常忘動靜，歸去上丹霄。
清真脫死生，縛住傻猿寧。氣結神靈達，了歸雲路行。
得一真明大，道全通世外。人間混俗塵，掛礙無罣礙。
道免死生危，了真霄漢梯。命光如皓月，愛泯永無虧。
卦盡休爭我，功圓成道果。天青萬象明，照見元初箇。
他非如自過，意定勝身坐。不著有形物，無愆成道果。
正理解清平，自然明大成。忘情全命耀，道養氣神靈。
常善運真火，靈通覺無我。廣明萬慧應，性似青蓮朵。
清平妙進明，頓覺氣神靈。達理中邊棄，自然入大成。
真通萬事容，清志碧虛中。汞結神光燦，道全了行功。
無爭道性強，保命濁情忘。永免輪回苦，真歸蓬島鄉。
善通覺有明，道闡樂真榮。厭世松峰畔，功成朝玉清。
動靜兩俱忘，自然覺性常。汞鉛成大藥，真了到仙鄉。
清善存三一，擒猿意不出。真明應變通，福地去遊歷。
對景省燈蛾，志堅出愛河。松峰霞洞隱，得一行功多。
德平萬垢容，清命與仙同。達理真無變，蓬萊雲路通。
善清爭性命，覺了傻猿定。天動氣沖和，陽純朝至聖。
通善滅無明，忘貪有甚爭。天條心不犯，歸真道光昇。
無我氣神清，命圓大道成。知明萬慧達，真去住蓬瀛。
忘情覺命堅，達理性明賢。氣順珠光燦，功成蓬島仙。
無我氣神靈，忘情命耀成。始終真在道，歸去到蓬瀛。
志堅明性命，妄盡心猿定。妙覺氣沖和，道成朝至聖。
道明出死生，真養氣神精。達理通靈慧，自然應變平。
念道消三毒，清心忘六欲。志堅全性命，知足通清福。
輪回五道轉，不造萬愆免。趁業樂清虛，保命真修鍊。
苦形忘愛念，命住修真驗。守道有終始，陰消因慧劍。
通經明正理，道覺真無比。混世卻無心，昇仙免下鬼。
休苦化人錢，結緣任自然。不貪清福廣，守道意無愆。
虛心包大藏，達理涌泉通。三教無分別，修真第一功。
無情命耀圓，無垢性光圓。無惡黍珠燦，無憎功行圓。
燈蛾迷愛光，遠色免無常。仙伴孤雲鶴，命清得道陽。
通善滅無明，道全神氣靈。命光成補缺，碧耀晃虛清。

臭爛變骷髏，迷陰墮馬牛。清真全性命，蓬壺閬苑遊。
通善行清深，自然火鍊金。功成真厭世，福地偽難侵。
守真堅志了，常善通微妙。氣絕命光圓，古今明者少。
無爭善氣清，光照似飛星。混合形神異，碧霄雲外行。
先天乃道初，生死物難拘。清命圓光瑩，陽純蓬島居。
垢盡晃空虛，真明棄有無。定光通萬慧，達了古今書。
性光命似油，忘愛了真修。世戀骷髏夢，千生臥土丘。
蛾戀燈光死，鶴尋雲路生。兩般由自己，天瑩萬輝明。
頓明厭世空，高臥白雲中。養就真鉛汞，超昇出寶峰。
定光得志寧，覺了互靈明。達理全功行，命圓脫死生。
德全盡愛憎，去濁寸靈明。養就真鉛汞，蛻形朝上清。
仙樂集卷之五竟